



Selasa, 19 Desember 2023
Ogen: I Samuel 1:1-6



Erkidua



Erkidua, ertina lit ndehara perbulangennta sideban seakatan kita. Adi gundari lanai bo lit kita diberu enda nggit erkidua. Tapi si menarik, i bas masa-masa nai, i bas sada kuta, erkidua e desken si semal, sekalak dilaki adi sada ngenca ndeharana tempa-tempa la "keren." Engkai maka genduri e enggo lanai popular janah rikutken aturen agamanta la banci erkidua? I bas dampar pusuh, erkidua e tentu la utuh. Sabap kai pe arus ibagikan. Hanna erbagi perbulangen ras Penina. Elkana perbulangenna bicara uga pe *perkeleng* atena man Hanna, tentu la banci seri perbahanenna, sabap Penina mereken sinursur man Elkana. Anak bas paksa si e, nentukan statusta i bas keluarga ras kempak jelma sienterem. I bas ngaloken perbahanen si bage pe tentu Hanna mecek pusuh. Adi si nen ka arah Penina, erkiteken lit lebihna akapna ia asangkan Hanna, jahat rusur perbahanenna. Situhuna ia pe menderit, sebab atena maka Elkana ras kai si lit bas perbulangenna man bana saja rikutken egona, tapi i bas pusuhna ietehna maka keleng ate perbulangenna tetap lit denga man Hanna. Jadi duana la sejahtera, duana ceda ukurna. Perbulangenna Elkana pe, ikut ka latih ukurna. Jakup 1:7-8 ngatakan maka kalak si ertupang ukurna la lit ketenengen bas ia. Erkidua nuduhkan ukur si ertupang. Sada kempak Tuhan, sada nari kempak gegeh sideban. Erkidua tanda la setia. Tanda la lit kesabaren ras kiniteken i bas jabu. Terdauhen sigargari, kepeken kalak si erkidua ndeher kawitenna ras penembahen ras kuasa kegelapen. Galatia 5:19 "*perbahanen-perbahanen si erpalasken sura-sura ukur manusia.....teridah i bas: erlua-lua, si nngesuh, dingen la meteh mela.*" E maka pindo gegeh man Tuhan gelah kita tetap setia. Siajar-ajaren ras teman geluhta gelah njagai pusuhna tetap setia, ula erkidua. Perembaklah jabunta ras Dibata, sabab Tuhan si netapkenca sada perbulangen sada ndeharana.

🔗 Kalak si setia man Dibata, setia ka man pasangenna.